

Drs. Rudy Lampe, lider di RED:

SI E PROYECTO TURISMO MEDICO SIGUI, ESAKI LO TA UN OTRO FRACASO

MANERA E PROYECTO DI BOOSHI WEVER DI DUMP

STA. CRUZ -- No solamente Hospital cu ta un instancia profesional a critica cu e proyecto aki ta un proyecto irresponsabel cu a construi un Centro Cardiologo leu for di Hospital di Aruba, si no tambe nos tabata tin un reunion de parlamento cu presencia di parlamentarionan di MEP dia 27 di Agustus cu e organizacion di enfermeronan di Aruba. Drs. Rudy Lampe ta sigui bisa cu esey tambe a indica cu no tin prioridad pa Aruba tin un centro cardiologico. Mas importante ta 1. Duna

un mihor organizacion na cuidu pa ancianonan. Tin un wachtlijst cu mas di 200 hende wardanado pa por haya un lugar na cas di cuidu di anciano. Nan ta menciona cu prioritario ta un centro pa atencion pa esnan cu ta padece di un enfermedad siquiatico, un clinica manera cu tin na Curaçao manera "Capriles Kliniek". Tambe pa un lugar manera "Monseigneur Verriet Instituut" pa atende muchanan y esnan cu tin cierto deficiencia y mester haya un cuidu special. Drs. Lampe ta sigui menciona cu mester cu urgencia

un Centro pa atencion di adictonan ambulante cu tambe ta padece di e enfermedad ey. Esey nan ta e prioridad pa Aruba. Esaki ta causando asina hopi dolor y sufrimento den nos pueblo, pasobra no tin e centronan adecua aki pa nan familiarnan. Segun Drs. Lampe no ta prioridad pa traha un centro cardiologo na San Nicolas. Como tampoco ta prioridad pa traha un hospital nobo. Segun Drs. Lampe efamoso cardiologo Arubano, Dr. Sprock internacionalmente reconoci ta pidi un

visibility study di e Centro Cardiologico aki. Nos a haci un cantidad di pregunta na Minister Wever cu otro siman dia 11 di September lo e bin parlamento pa contestanan; nos a expresa nos duda pa motibo cu Min. Wever a menciona cu e no ta un proyecto pa atrae turismo medico. Y den pasado caba nos tabata tin e clinica posada cual tabata exclusivamente pa patientnan local so, kiermeen e no a resulta. Y e estilo aki cu minister Wever tin acuerdonan cu e fundacario di Valencia. Si

bo bay e website ni esey ta funciona. Kier meen cu e acuerdo cu e centro aki di Valencia, e no tin e nomber Internacional pa bay atrae loke Minister Wever ta indica, como un di su obhetivonan turismo medico. Mescos cu contrario na baha gasto di AZV, e proyecto aki ta bay aumenta gasto di AZV. Segun sr. Lampe durante un siman lo trece e cardiologonan for di Valencia. Kiermeen bo ta aumenta pa AZV pa e centronan por run y esaki no por ta na interes di e pueblo di Aruba.

Dr. A. R. Lampe di RED:

Presentacion di boeki di Parlamentario Lampe den Biblioteca Nacional *un éxito rotundo*

STA. CRUZ -- Dia 2 di September a tuma lugar e presentacion di e ultimo boeki di Armando 'Rudy' Lampe, publicista academico y a la vez na e momento aki parlamentarario. E acto literario aki tabata un gran éxito. Na prome lugar por aprecia riba e portret e cantidad di persona cu a asisti na e evento literario aki. E sala tabata yen yen y no por a acomoda mas hende. E cantidad di hende cu a bin pa disfruta di un anochi literario/cultural a supera tur expectativa. E tabata un éxito tambe mirando e calidad di e discurso di cada comentarista. Pastoor Rene Villamora di Iglesia Catolica, Rev. Jacobs di Iglesia Anglicano y Ernesto

Rosenstand a trece reflexionnan profundo riba e topico di e boeki, esta un sacerdote den politica. E titulo di e boeki ta "Mi ta djis cumpli cu mi deber. E valornan cu a guia mi di sacerdote pa politico". E anochi tabata den man di e moderador, sr. Tito Sapuana. Riba e otro portret por mira e momento di entrega simbolico di un ehemplar di e obra na e Directora di Biblioteca Nacional, sra. Astrid Britten, door di e autor. E autor mes a tene un breve discurso riba e significado di e portada di e boeki. A clausura e anochi exitoso aki cu un brindis, mientras cu e publico presente por a cumpra e boeki y ricibi un autografo di e autor. Tur hende tabata

comenta cu e tabata un anochi sumamente educativo y cu e no tabata un acto politico. Esnan cu no por tabata presente na e presentacion di e boeki tin otro oportunidad pa ricibi un autografo di e autor. Lo tin e siman aki dos encuentro di booksigning. E prome ta diabierna dia 5 di September 2008, entre 3'or y 6'or di atardi, na Librería Antraco situa na L.G. Smith Boulevard. E di dos ta na Librería Van Dorp situa na Dakota, entre 11'or di mainta y 1'or di atardi. Lo tin oportunidad pa tin un intercambio personal cu e autor. E prijs di e boeki ta solamente 25 florin y e contribucion aki ta yuda planta bon gobernacion aki na Aruba. Biblioteca

Nacional a demostra via e organizacion di e evento literario aki di ta na altura di loke ta spera di un biblioteca nacional. E a converti su mes den un espacio di promocion di cultura y lesamento di boeki. Un espacio di intercambio di idea y tabata un bon inicio di e luna cultural, cu ta luna di September. Pabien na Biblioteca Nacional!

